

- प्रधानमंत्री नरेन्द्र मोदी नई दिल्ली मांय इंडिया एआई इम्पैक्ट समिट रे दौरान न्यारा-न्यारा देशां रा नेतावां सागे बैठक कीनी।
- जल जीवन मिशन घोटाला रा 9 आरोपितां ने 3 दिन री रिमांड मांथे भेजी ज्या।
- राज्य रा खास सामान ने दुनिया मांय पिछाण दिरावण सारू एक्सपोर्ट हब बणाया जावेला।
- प्रदेश रा केई जिलां मांय बारिश रे कारण पारो उतर्यो।

000

प्रधानमंत्री नरेन्द्र मोदी भारत एआई इम्पैक्ट शिखर सम्मेलन मांय सिरकत करण सारू नई दिल्ली आया दुनिया रा न्यारा-न्यारा नेतावां सागे मीटिंग कीनी। श्री मोदी आज स्पेन रा राष्ट्रपति पेद्रो सांचेज सागे भेंट कीनी। नई दिल्ली रा हैदराबाद हाउस मांय दोन्यू नेता कारोबार अर माली व्यवस्था, डिजिटल नवाचार, स्वास्थ्य, जलवायु मांय बदलाव अर भणार्ई लिखाई सरीखा न्यारा-न्यारा हलकां मांय भारत-स्पेन साझेदारी और मजबूत बणावण रा बारा मांय चर्चा कीनी।

000

सूचना अर प्रसारण मंत्री अश्विनी वैष्णव कह्यो है के भारत दुनिया री समस्यावां आगी करण सारू ए.आई. मांथे खास ध्यान दे रह्यो है। वे इंडिया एआई इम्पैक्ट समिट रा तीजा दिन आज एक अनुसंधान संगोष्ठी रा उद्घाटन जळसा मांय बोल रह्या हा। श्री वैष्णव कह्यो के भारत कारखानां री उत्पादक मांय सुधार, स्वास्थ्य देखभाल, खेती-बाडी अर आब-ओ-हवा मांय बदलाव सरीखी समस्यावां रा हल सारू एआई रा इस्तेमाल मांथे ध्यान दे रह्यो है अर एआई शिखर सम्मेलन ई सारू उचित मौको है।

000

प्रधानमंत्री नरेन्द्र मोदी रा 28 फरवरी ने प्रस्तावित अजमेर दौरा री ज़ोरदार तैयारियां चाल रही है। जिला प्रशासन अर पुलिस री ओर ऊं हिफाजत, आवण-जावण अर सभा री ठाँड मांथे करी जा रही व्यवस्थावां रो जायजो लेवण सारू मुख्य सचिव वी. श्रीनिवास अर पुलिस महानिदेशक राजीव कुमार शर्मा आज कायड़ विश्राम स्थली रो दौरा कीनो। प्रधानमंत्री कानी ऊं प्रदेश ने अजमेर ऊं साढे 23 हजार करोड़ रुपया रा खर्च ऊं करायी ज्या विकास रा कामां री सौगात दी जावेला अर रोजगार उत्सव रे ज़रिये 21 हजार नौजवानां ने नौकरी लागण रा कागज़ात दिया जावेला।

000

जल जीवन मिशन रा काम ऊं जुड़्या 900 करोड़ रुपया रा कथित घोटाला मामला भ्रष्टाचार निरोधक ब्यूरो कानी ऊं पकड़ी ज्या नौ आरोपितां ने आज जयपुर री एक अदालत मांय पेश करी ज्या। पेश करी ज्या सगळा आरोपितां ने अदालत तीन दिन री रिमांड मांथे भेज दीना।

ई मामला री ए.सी.बी. कानी ऊं करी ज्यी हाल ताई री जांच मांय दो गैर सरकारी कंपनियां कानी ऊं फर्जी सर्टिफिकेट रे ज़रिए करीब 900 करोड़ रुपया रा काम रा टेंडर हासिल करण री ठा पड़ी है। ई मामला मांय पी.एच.ई.डी. रा अहलकारां मांथे टेंडर रा नियमां मांय बदलाव कर र भ्रष्टाचार ने बधावो देवण रो आरोप है।

000

राज्य मांय नेक्स्ट जनरेशन सिटीजन सर्विस रिफॉर्स रा तैत वन्स ओनली प्रिंसिपल लागू कर्यो जावेला, जिण मांय जनता ने एक ही कागज बार-बार न्यारा-न्यारा महकमां मांय देवण री ज़रूरत नी रहवेला। राज्य रा माली साल 2026-27 रा बजट मांय ई बाबत् प्रावधान करी ज्यो है। सरकार व्हाट्सएप रे ज़रिये ई 100 भांत रा सुबीता मुहैया करावेला।

ई सागे ई 25 हजार नौजवानां अर महिलावां ने मिनी ई-मित्र रा तौर ऊँ काम करण रा हम दिया जावेला। नगरीय निकायां मांय स्मार्ट सेवा केंद्र खोल र जन्म-मरण, ब्याह रा पंजीकरण अर फायर एनओसी लेवण रा सुबीता ऑनलाईन ई मुहैया कराया जावेला। नीति बणावण सारू सीएम-प्रमाण यूनिट अर रीति संस्थान सारू 10 करोड़ रुपया रो प्रावधान करी ज्यो है। नुवा बणायी ज्या जिलां मांय मिनी सचिवालय बणावण अर ग्राम पंचायतां मांय बुनियादी ढांचा सुधार सारू तीन हजार करोड़ रुपया खर्च कर्या जावेला।

000

राजस्थान राज्य पाठ्यपुस्तक मण्डल प्रदेश रा सगळा किताबां बेचण वाळा ने केवल अधिकृत किताबां री ई खरीद-फरोख्त करण रा हुकम दीना है। मण्डल साफ कीनो है के बाजार मांय केवल आरएसबीटी वॉटरमार्क वाळी किताबां री ई खरीद-बिक्री व्हेवणी चाहिजे।

000

प्रदेश रा हर जिला रा खास सामान ने दुनिया भर मांय पिछाण दिरावण सारू एक्सपोर्ट हब विकसित कर्या जावेला। उद्योग अर वाणिज्य मंत्री कर्नल राज्यवर्धन राठौड़ आज विधानसभा मांय प्रश्नकाल रे दौरान आ जाणकारी दीनी। वे बतायो के वन डिस्ट्रिक्ट वन प्रोडक्ट नीति रा तहत सामान दिसावर मांय बेचण, तकनीक ने और बेहतर बणावण अर परिवहन सारू माली मदद दी जा रही है। मंत्री बतायो के बजट मांय ई सारू 36 करोड़ रुपया रो प्रावधान करी ज्यो है, जिण मांय 350 इकाइयां ने 16 करोड़ रुपया री मदद दीरीजी है। राजसमंद मांय भाटा री मण्डी रा विकास सारू एक करोड़ 80 लाख रुपया मंजूर करी ज्या है।

000

प्रदेश मांय 200 बंधां अर तळावां ने और चोखा बणावण सारू 300 करोड़ रुपया खर्च कर्या जावेला। जल संसाधन मंत्री सुरेश सिंह रावत आज विधानसभा मांय प्रश्नकाल रे दौरान आ जाणकारी दीनी। वे बतायो के टोडाभीम रा बिशन समंद बांध अर नहर रो काम आवता साल ताई पूरो करणो तैय करी ज्यो है। ई सारू 229 लाख रुपया ऊँ बत्ती रकम मंजूर करी ज्यो है। मंत्री बतायो के नहर ने चोखी बणावण सारू 4 फरवरी ने ई वर्क ऑर्डर जारी करी ज्यो है।

000

लोकसभा अध्यक्ष ओम बिरला आज कोटा पुलिस कंट्रोल रूम परिसर मांय यातायात जागरूकता पार्क रो उद्घाटन कीनो। ई मौके वे कालिका पेट्रोलिंग यूनिट ने हरी झंडी बता र रवाना कीनी। श्री बिरला सी.एल.जी. रा सदस्यां अर सुरक्षा सखियां सागे बातचीत करता थकां नशा अर अपराध रे खिलाफ जनता री भागीदारी बधावण बाबत् कह्यो।

000

राज्य मांय जयपुर, भरतपुर, अजमेर अर कोटा संभाग मांय काल बादळां री गाज सागे ओळा पड़बा रा आसार है। मौसम केंद्र जयपुर रे मुजब काल ऊँ प्रदेश रा केई हलकां मांय मौसम धीरे-धीरे साफ व्हेवण री संभावना है, हालांकि आवता दो-तीन दिन मांय पारो 2 ऊँ 4 डिग्री सेल्सियस ताई उतर सके है। ई बीच लारला 24 घंटां रे दौरान पश्चिमी विक्षोभ रा असर ऊँ राज्य रा केई हलकां मांय बिरखा व्ही। जयपुर जिला रा नरैना मांय सब ऊँ बत्ती 27 मिलीमीटर जद के हनुमानगढ़ जिला रा नोहर मांय 20 मिलीमीटर मेह बरस्यो। मौसम केन्द्र जयपुर रा निदेशक राधेश्याम शर्मा काश्तकारां ऊँ साखां अर अनाज ने सुरक्षित ठौड़ां राखण री राय दीनी है।

000

रमजान रो पाक महीनो चांद निजर आयां पाछे आज सरू व्हे रह्यो है। हिलाल कमेटी री ओर ऊँ काल पहलो रोजो राखण रो ऐलाण कर्यो जवेला। ई बीच, रमजान री तैयारियां तेज व्हे गयी है अर खजूर, फल अर खाण पीण री दूजी चीजां री बिक्री बध गयी है। सरूदी अरब समेत न्यारा-न्यारा खाड़ी देशां मांय चांद दीखण सागे काल रमजान रो पाक महीनो सरू व्हे गयो अर आज पहलो रोजो राख्यी ज्यो।

000

भरतपुर ज़िला रा बांध बारेठा मांय सैर-सपाटा ने बधावो देवण सारु जल क्रीड़ा सरु करी जावेला अर नावां चलायी जावेला। ई परियोजना मांय सैलाणियां ने बिजली ऊं चालण वाळी नावां अर जेट स्की सरीखा सुबीता मुहैया कराया जावेला। म्हाणा भरतपुर खबरनवीस बतायो के सैलाणियां री हिफ़ाज़त सारु लाइफगार्ड, सी.सी.टी.वी. अर डिजिटल टिकट सरीखा सुबीता ज़रुरी व्हेला।

000

पुलवामा हमला मांय शहीद व्ह्या श्योराम गुर्जर ने आज वां री सातवीं बरसी रे मौके सिरधा भाव सागे याद करी ज्या। ई मौके झुंझुनू ज़िला रा टीबा गांव मांय खास कार्यक्रम राख्यी ज्यो। कार्यक्रम मांय ज़िला सैनिक कल्याण अधिकारी कर्नल सुरेश जांगिड़ समेत मोकळा लोग शहीद श्योराम गुर्जर री मूरत माथे फूल चढा र वां ने नमन कीनो। ई मौके शहीद श्योराम री हिम्मत ने याद करता थकां लोग कह्यो के वे पुलवामा हमला रा खास आतंकी कामरान गाज़ी ने ढेर कर दीनो हो। कार्यक्रम मांय शहीद री वीरांगना सुनीता देवी रो मान करी ज्यो।

000

बांसवाड़ा ज़िला मांय प्रधानमंत्री सुरक्षित मातृत्व अभियान रा तैत आज खास जांच शिविर लगायी ज्यो। शिविरां मांय आस वाळी लुगाइयां री स्वास्थ्य जांच करी ज्यी अर खून री कमी री रोकथाम माथे खास ज़ोर दियो ज्यो। खून री कमी वाळ लुगाइयां रे राज्य सरकार री ओर ऊं मुफ्त इंजेक्शन लगायी ज्यो अर मां वाउचर योजना रा तैत मुफ्त सोनोग्राफी रा कूपन दिया ज्यो।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय 22 फरवरी ने विचार बतावेला। आ ई कार्यक्रम री 131वीं कड़ी व्हेला। ई सारु आप ई मुफ्त नम्बर 1800-11-7800 माथे राय दे सको हो। ई रे अलावा नरेन्द्र मोदी एप अर माय जीओवी ओपन फोरम रे ज़रिए ई 20 फरवरी ताई विचार भेज्या जा सके है।

000